



無錫金匱縣志

卷二十七之三十八

列女

ル 5
3047
11



門ル 6
號 3000
卷 11

門ル 6
號 2300
卷 11

門ル 5
號 3047
卷 11

無錫金匱縣志卷二十七

列女

舊志沿史家之例甄錄列女多尙節烈其安常履順者
概不及焉豈以所重在彼不在此哉夫閨門恒行既若
書不勝書故耳目易忽雖賢弗著而其遇彌苦者其節
彌彰亦理勢然也然以樹貞風砥頽俗烈霜勁草君子
必於是乎取焉志列女第三十一

宋

尤大成妻范年十九大成卒三日不食飲以其子申屬舅
妾徐持夫佩劍自刎有司給粟養其子而表其墓曰貞

昭和九年
六月十八日
購求

節申旣長以母死於劔戒家人無得殺牲終身不服紈綺以從弟輝恩當得官辭不就

蔣南式妻顧忠文重珍母也少育於外家管氏一日父母家絕食女剪髮貽其父鬻以給炊歸蔣而寡重珍甫十歲有累舉得官者屬嫺黨議婚顧叱去之親授重珍經書平生喜說李氏斷臂事謂婦人當如此所居僅容膝而內外區別不可越貧甚或乞重珍爲嗣不聽有願以女贅者田廬畢具顧曰藐孤所以得不死者諸父力也豈可去之重珍舉進士第一人迎養於京邸

孝婦尚書尤焞妻吳事姑孝姑性嚴卞常苦目疾一日痛劇欲自投池中吳慟哭禱天刺臂血和藥進姑疾自是瘳

元 都事華鉉妻陳明淑年二十八而寡誓不貳志撫孤幼武成立至正間表其門幼武作貞節堂奉之一時名人多題贈焉蘇州俞貞木志其墓

鄒琪妻華冬孀至正丁酉兵起鄉人奔竄冬孀從其夫匿草野中兵卒至度不得脫顧謂琪曰我義不可辱君善自保赴水死

明

華文浚妻黃淑瑛年二十七而寡養姑教子以壽終

吳國祥妻劉如玉盛年而寡子璠亦天與璠婦朱撫其孤
孫時敏成立洪武中旌其門時敏作堂題曰思貞以志
之曾孫益亦早卒妻尤守節如劉撫子翀以儒名成化
中旌

白洋鎮巡檢張文煥妻邵事詳文煥傳

御史陸士隆妻某事詳士隆傳

燕山衛卒儲福妻范事詳福傳

工部主事徐弼二妾逸其姓事詳弼傳

贈尚書顧壽妻蔣壽與父福五並以倡義捍患於永樂十

一年詔旌義士是年福五卒於京師壽扶柩歸尋卒蔣

年二十八子信七歲家僅一椽卽其地營葬旁結草舍

以居晝夜號泣不三年亦卒永樂十八年旌

華淑妻翟年十六而寡父更許他氏翟以死拒乃止事姑

孝姑卒鬻衣飾以葬年七十餘以苦節終

華宗常妻鄒淑惠宗常疾革以孤託其母而不及妻鄒歎

曰妾之心夫尙有所不知自經死年二十一又二日宗

常卒

魏思民妻沈思民卒無子沈年二十一撫外孫爲後教養

成立宣德初有司以聞陳繼爲之傳

楊崇順妻呂媿早寡子河海尚幼家極貧事舅與繼姑至孝又節儉能起其業買田走馬塘而迎二老以居族號其居爲北莊

趙禮妻楊禮卒楊年二十七父母將嫁之不從衣食於女紅卒成其志正統中旌

壽光丞茹洪妻陸媣洪疾革執媣手指其子璿曰善保此孤媣泣曰妾苟懷二心者有如日洪卒鬻簪珥挈遺孤千里歸葬正統中旌其門洪族子惟賢早卒婦關撫孤守節與陸先後旌關之曾孫萬鍾亦早世婦尤以苦節稱

余彥昭妻楊淑華洪武初彥昭戍滇南死楊年二十一子同善甫及期家貧守志養姑強以壽終旣而同善亦死遺腹子庠楊與其婦姜共撫庠底於成姜先卒楊正統中旌

陳文俊妻厲文俊死於役厲年二十七子公約甫三歲父母欲奪其志厲自經家人救之得不死奉姑教子終其身景泰間旌

鄒時揚妻錢時揚病錢露禱請代寡時年二十一鄒饒於貴錢事婦事惟謹紡績有間則獨坐未嘗越中庭一步從子望爲立後守節四十三年邵文莊實爲之傳

錢公達妾姚年十八公達卒父母將嫁之姚截髮以誓乃
免天順中旌

虞宗約妻孟德厚宗約母孟族姑也盛年寡居孟父憐宗
約而妻之年二十三而寡姑婦相依無二志成化中旌
李昌妻周蘇之農家女也昌故爲鄒佑之僕昌死周年二
十二大慟曰吾必下從吾夫矣昌既葬或諷之嫁周益
慟誓必死主母使左右守之守者懈自經後昌死二十
一日

華緯妻吳正德中劇寇劉齊犯江陰吳出走卒遇寇以刃
脅之不從磔其屍投之江中

登封訓導尤輔妻成輔遊學靖江成從焉成化丁未五月
江水夜至家人倉皇升屋成整衣欲上問爾等衣耶眾
謝倉卒不暇成曰安有男女裸而可與俱生耶我則獨
留死爾卒不動厥明水退坐死榻上成定陶教諭繪女
明史有傳後有倉橋俞氏夜火火至寢主婦某求衣未得一
僕冒火救之婦曰甯死爾豈可裸而出遂焚死二人立
志略相類惜不著婦姓氏

國子生吳鈇妻秦孝子旦女也年二十八鈇卒遺腹子生
四歲夭乃歸依父母以居以弟子瀚爲後年七十二受
旌又十有四年而卒其媵丁七歲從歸於吳終身不嫁

沈昇聘妻單未嫁而昇卒翦髮自誓聞有委禽者乃自經
幾絕嫂解之又引刀刺臂流血盈襟將斫腕家人奪其
刀而止卒守貞老於家年至八十五正德中巡按御史
爲建祠惠山

盧齡妻顧年二十三而寡截髮納棺中爲誓撫孤天宿茹
荼六十餘年及卒邵文莊寶嘗爲詩弔之

俞暉妻楊年二十八而寡慟欲絕葬之日大風雨不能舟
楊躑躅泥石間臨哭卽事初暉且卒書雪操冰心四字
付之楊粘之寢壁坐臥瞻焉家貧舅姑老二子憲寰才
數齡有欲奪其志者則指壁書以誓姑病扶抱吮摩頰

盥便液皆躬奉之親授二子讀嘉靖十二年旌武進唐
順之爲作旌節碑銘憲見文苑傳

秦漢聘妻熊壽芳蘇州人通孝經列女傳諸書年十五聞
漢暴卒哀痛幾殞媒至覺其故卽闔門自縊驚救不死
父母終以其年少頃之復議婚他氏熊引刀斷髮截右
耳血滂然仆地昏絕良久乃蘇自是不敢他議及漢葬
斬衰來會以堊畫穴冢旁曰死必歸此旣返茹荼服素
有司以聞詔月致薪米俟年而旌其後漢父都事銳謂
不可使熊無嗣乃命漢兄子標後之俾定省於蘇熊父
母歿遂迎養焉逾年爲嘉靖三十五年始旌其門時熊

年五十四又十餘年卒王文恪鏊爲之傳漢再從兄子梁以文表墓云

贈副都御史邵溥妻過文莊寶母也年二十二而溥卒寶甫三歲族人欲奪之矢不二及析產金帛泉貨無所取獨取先世遺書千餘卷曰將與兒讀之寶入太學過鬻產暨諸服飾以給之俾卒業通籍後迎養官舍在許州時寶毀淫祠寺觀人欲沮之因間以請於過過曰此詔旨也可廢格乎俗例州官母生辰輒納女賓爲壽過曰是謁階也不許後病寶五疏乞終養歸嘉靖初命有司以禮存問初寶除副都御史制辭有曰矧予風紀之臣

上有貞節之母王文恪鏊爲作貞節碑文

鄒魯妻華年二十九魯死遺孤申甫二歲撫之迄有成嘉

靖中旌

烈婦吳閩江人適武進王岳岳病亟籌身後事吳曰妾當死於君前召其兄弟及夫族屬家事畢乃拊女而寢有頃已自縊死越五日岳卒吳年二十四嘉靖中旌

鮑巘妻呂御史尙女二十二夫亡苦志五十年撫鮑前妻之子甚慈一女適李貧而寡乃攜歸同茹苦以節終

吳琛妻李以孝稱琛卒李年二十九伯叔氏不與相協李教子成立持家事不貽其舅憂

錢棻妻胡妙真棻幼病癘胡歸時棻已爲廢人遂請立族子爲後棻卒胡年二十七舅惑後妻悉以田宅畀女而斥婦還父家服除歸請留事不許號哭以行僦廬蔣巷紡績自給既稍裕姑且老而女養不終胡請迎養慚不往則別構廬具以奉舅姑而自留蔣巷間一往省姑慚終不見戒勿復來胡遣候不怠姑死乃移入奉其舅卒後喪祭如禮張愷爲之傳

華音妻鄒年十九歸音五年而音卒有女適鄒成章亦二十四歲而寡母子相依食貧厲志並以壽終

華立妻鄭年十九而寡守節五十九年妾周感鄭志操亦

斷髮自誓以節終

贈御史胡觀妻闕年十八歸觀九年觀卒觀兄坤先客死婦趙年少矢志闕實周旋之既而趙子芳亦夭婦錢年十九三孀相依不渝其守及闕子淳舉進士聞於朝旌闕趙而錢格於年有司匾其堂曰三貞後淳妾許年十九淳卒矢志不二亦以苦節稱

孟澤民妻莫寡時年二十一子公泰甫三歲其媵談年十七莫謂曰我爲人妻義不再適汝婢也服闋當嫁談泣曰主母爲貞婦妾奈何有二心且舍妾誰當輔主者闔戶紡織共撫孤孤長家稍裕相守五十餘年

陸子才妻蔡孝子元銳女也嘉靖中倭犯無錫蔡歸甯舟行控江門外聞有寇急入城而倭已至見蔡美將污之蔡悉出所攜金幣求免不得顧見旁有虛舟因給寇過彼乃從汝寇喜牽其臂蔡亟嚙其手流血得脫投水中死婢三曰阿滿招女三英僕婦二人徐姓皆從死詔旌其門

周文妻錢文有文翰所居齋多古名蹟奇器有小清閣之目後遇道人授秘戲之術以不檢爲蘇州武弁所訟避匿他所錢被羈絀榜掠幾死一夕文忽夜歸錢泣謂曰今夕不留子則夫婦恩絕萬一留子而妊六年清白敗

於一旦奈何文然其言相持慟哭而去遂不復歸錢時年二十九家已破製網巾自給又四十年而終通判周俊民斂葬之題其墓曰節婦冢

國子生楊菽妻劉夫亡年二十九子幼姑年老見侵於族人產益削姑卒子甫婚而天孤孫應文甫四歲貧不自存劉泣曰不能自振何以保孤一僕忠而才使以事聞於有司復其舊業應文舉進士厯官太僕少卿萬厯中旌

華理妻鄒嘉靖中避倭亂爲所得鄒死不從乃褫其衣而束以帛鄒念必不得免見寇植刃於路遂盡力騰身而

上觸刃穿腹死年二十二

案舊志作錢理本姓華志外云此支實錢鉅之後而歸宗者應改錢爲華今從之鉅見孝友傳

華蘭芳妻楊年二十六夫亡二孤相繼歿家貧衣食不給誓以死守年六十餘卒

華庠妻吳庠死家極貧一子在襁褓吳矢志不移及子長傭耕以養母

孝子浦劭妻過年十九歸劭嘉靖三十三年劭以脫父於倭被磔死野田中過聞奔視仆絕久之甦收夫屍七塊出長布纏合之入棺葬之石室山下過時年二十七子正平尙幼正和猶在娠舅姑皆老過以一身俯仰任荷數十年萬曆四十一年先劭得旌

華仁夫妻黃年二十五而寡有欲奪其節者黃泣曰夫訣時以母與孤是託敢有他志

沈璵母李璵失怙時方五歲李年少里豪某欲奪爲妾李誓死不許紡績以教子璵長以孝稱母歿斂葬畢璵哀毀死妻費從死遺孤偉五歲烏程筆王沈某與璵善攜之歸教以讀書補邑諸生

秦炯妻華夫疾割股療之者再守節三十四年

諸生華夢旭妻胡年二十三夫亡子善繼甫二歲善述猶在娠胡苦志七十三年以清節著萬曆二十三年旌二

子俱孝友工詩

布政使龔勉繼妻李年十六歸勉十年而寡勉歿後家漸落李與其孫續祖妻徐共守節五十年

華茂才妻胡奉化知縣潛女年二十茂才卒父母憐其少諷以意胡剪髮自誓萬厯中旌茂才弟茂和妻馬忠肅世奇姑也年二十六而寡胡與馬俱無子年俱七十終茂才季弟子焜祁妻談亦早寡撫三月孤苦節三十年華三德妻浦夫死時年二十一遺孤僅兩月孀居二十餘年足不踰戶及舉孫抱謁夫主流涕嗚咽示畢志焉孝婦贈侍郎顧學妻錢端文憲成母也事姑孝姑好以意

求錢委曲順之家故貧斥奩具以供膳一日匱乏從鄰婦摘蔬取乳劑之以進姑食之甚甘姑歿哀毀得疾卒華登灝妻奚年二十三而寡遺孤甫八月撫之成立年六十一終

盧肇庚妻李肇庚亡遺孤顯謨李自教之學顯謨娶婦許生子鼎臣而亡鼎臣既娶亦亡三孀相依以苦節終鼎臣妻失其姓

諸生華洙繼妻陸洙博學有文早卒陸年二十二素善琴夫歿後撤去之終身不復鼓琴

諸生華樹聲妻鄭年二十五樹聲死家貧無子以女紅自

給樹聲弟樹德妾許年二十而寡誓不他適樹德子耀妻黃婚六月而耀亡不二志萬厯中旌

秦達材妻蔡年二十一達材卒蔡素通孝經四子書聚村中兒課之讀鄰媪攜雞黍來餉以是得奉姑甘旨姑卒謝遣生徒食貧厲志三十餘年

孝女何父病膈醫藥罔效女刲股肉進之愈幼許字劉志志父投尤氏爲奴女惡爲家奴婦而難顯言剪髮事佛劉強娶之去女毀容截左耳誓不屈後還母家歷三十年以梵誦終其身

黃氏幼爲殷氏女奴殷夫婦相繼歿遺孤三人其二尚在乳哺黃保抱之有老僕二人黃責以大義曰吾與若俱受主恩今主亡孤幼若應其外吾營其內以存諸孤他僕以黃年少欲犯之叱曰汝人類不念故主乃欲爲禽獸行請於殷族逐之孤長皆爲娶婦殷氏以全

錦華學士華察少子叔陽妾也叔陽善病察斥錦華歸之歛人錦華毀容飾侍兒自代而身獨居叔陽卒錦華同日自經死

王大紳妻浦二十八歲而寡盡斥嫁時衣飾晝夜紡績以奉姑子四俱成立

王希裕妻呂夫亡呂年二十六撫十月孤教之成立苦節

五十餘年

傅士庭妻顧年二十三而寡苦節盡孝三十餘年萬曆中巡按御史表其門

孝貞女盧年十六父文烈病革謂曰汝母年尚小二弟幼汝適人將誰依女泣曰兒願終身不嫁與母與弟相守耳父乃瞑母曰吾力尙恐不能保汝二弟何能及汝女獨處一室爲網巾鬻以自給既稍裕爲弟娶婦婦間與母諍語女不食自責婦化之

高宗孝妻徐年十七歸宗孝未越月而寡誓以死殉縊柩旁姑解之越日仍自經死萬曆中巡按御史表其墓

楊方妻孟方死伯氏楊良利其產改許後圻張姓者夜半戒飛艇不及衣履裹以被刼之行孟欲投水不得竟擁入張姓家孟截髮求死會其父孝言於陳太常幼學乃歸守節三十四年

顧懋德妻傅懋德業鬻煤事父孝而早卒弟以不肖傾其家有以富室誘傅改節者不應自經於牀姑救之得不死又投河復以救免忍饑苦守終其身

范汝誠妻華年十八歸范時汝誠已病未成婦而寡長齋守志以終

王家業妻張家業死京師喪歸張撫棺慟自以有妊不死

既生男撫育盡瘁每姻黨讌集未嘗與焉

朱士英妻周寡時年十八業紡績以贍瞽日翁內外迫脅必奪其守至自經者再復投水數次而後已萬厯中旌華道英妻胡道興妻張俱二十三而寡張無子截髮自誓胡以哭夫喪明撫遺腹子卒年五十六

華性義妻李性義方死目視李不瞑李嚙指自誓乃瞑家貧常絕粒餘一鏡易米以奉姑而已與孤食糠粃有欲奪其志者舉鋤中肩不爲動萬厯中旌少子棐妻陸守節如其姑

王有道妻秦年二十九有道卒時舅姑年皆八十而子僅三歲家多難以節孝終

華亨時妻葉年二十四而寡家貧舅老紐績以養巡按御史給粟帛表之

沈士珍妻馬年十九夫亡自經死天啟中有司表其墓趙之俊聘妻華之俊死誓不他適終身侍母母亡撫幼弟成立補諸生又死復撫其孤凡五十餘年某氏有妖憑物爲祟女叱之遂不復見

王天麟妻單年十九孀居無子以壽終

辛愼妻陸年二十夫死爲族人所逼引刀髣面以全其節趙士賢妻王年十八士賢死於水王亦赴水殉家人亟救

之得不死遺腹生子守之以終

華寅壽聘妻楊寅壽死不更字父勸之輒號泣求死知縣

李復陽給米贍之

華存仁妻朱年二十三而寡無子舅以家貧欲令他適朱
指心自誓竟以節終

烈女華淑貞許字吳縣朱某朱得瘋疾議解姻女曰乖吾
志矣何以生爲自經死

顧漢臣妻沈浙之烏程人也年十七歸漢臣二十五而寡
以貧自守至壽終崇禎中旌

祝鴻業妻施鴻業死施年二十憑棺剪髮一以殉夫一自
佩誓不二心家貧甚歲游饑或勸其改適施剔目以示
志甲申之變不食死

僉事安如山妾吳希范生母也十五歸如山時如山年已
及耆婦郭性甚厲吳有娠七月匿不敢言既生希范欲
溺之而如山弟如陵婦鄒早寡無子因襁以付鄒居周
涇母子不相見者數歲如山與二母相繼歿希范方七
歲無所依復撫於吳如山遺命伯子析產於弟伯子卒
諸姪匿不予吳曰兒苟材奚必食先世之餘自是復之
周涇後希范舉進士官行人奉使過家請母就養不果
行無何希范以抗疏言事罷歸吳慰之曰此時見爾不

異周涇歸也希范遂不復出以終

安如陵妻鄒希范嗣母也年十七歸如陵十九而寡無子
希范生彌月撫以爲嗣時苦節己十九年矣希范七歲
而鄒卒守節二十六年

華允謨妻浦歸數月而寡臨卒曰吾二十年來視息人間
直寄耳生不愧死死不愧生

秦煒妻胡婚甫三月而寡遺妊不育守節二十二年

華葆光妻徐寡時年二十四家貧守志足不踰閭三十年
華茂森妻李夫亡貧甚舅以婦年少而無子微示他意誓
不從歸依母氏其兄弟欲強之抑鬱成疾既劇乃曰死

於此非正也昇至夫家而歿年二十七

華世忠妻浦年二十五世忠卒撫遺腹子成立巡按御史
旌其門曰節孝馬忠肅世奇作傳以表之

華嘉穀妻許性方嚴其所服御雖子女弗與其守節三十
餘年

華九德妻馮年十九守節衣食取給十指與其娣九韶妻
吳子婦薛並勵冰操

鄒萬程妻華早寡夜輒臥夫棺下見婁東沈承妻薄氏哭
夫詩泣曰彼有孤可撫且死吾何戀遂扼吭而卒

吳九德妻王九德死姑老且病王生事死葬以禮持家計

畢婚嫁奉詔旌

葉允晟聘妻薛未嫁而允晟死訃至已葬走哭於墓依其
孀姊以居姊適王永觀年二十六矢節兩人以紙績自
給終其身

秦城聘妻顧將婚而城卒歸秦奉舅姑以守食貧矢志雖
至戚不聞其笑語聲

湯榮聘妻方榮死闔戶自經者再請於母成服送葬供木
主於小樓臥處其側守貞以終

陳邦選妻徐遭亂潰兵掠無錫執邦選并逼徐抱幼女赴
水死

烈女陳許字徐文美文美為梓人墮河死陳素練自縊以
殉鄒迪光為文建祠祀之

顧世華妻黃嫁十年而寡言不出閫卒以貧死有婢相依
二十年終身不嫁

孫景惠妻王年二十六景惠死撫三孤親族凌侮忍而不
校以壽終

贈侍郎張集之妻劉早寡有三子口授以經兼父師事垂
五十年

陸亨聘妻張年十三亨死守貞歷六十年始歿事父及繼
母至孝天啟中旌建祠九龍峯坊側

華世炫聘妻鄒年十三世炫夭有媒氏來議婚女悲憤投井未死父母知其志不復強守貞終其身天啟中旌

翟應南妻錢應南挈家遊京師而卒遺孤甫三月錢奉姑扶襯而還姑死於道及抵家舅復死錢欲自盡念三喪在殯匍勉營葬守志以終天啟中旌

諸生嵇兆和妻尤早寡妾許生子五齡家日貧尤與許共守撫孤光世成立

進士賈明佺妻堵明佺未仕卒堵事姑華至孝縞衣蔬素舉止樵樸人不知爲名家女也

葉之藩聘妻華年十六之藩死訃聞遂歸於葉成婦服無

父母舅姑伶仃獨立卒年三十有七

諸生唐士奎妻張寡時年二十五事舅姑盡孝崇禎中旌
贈主事侯世美妻王世美砥行績學早卒孤鼎鉉甫八歲王守志撫之鼎鉉成進士出黃忠端道周之門王命鼎鉉爲父請銘有詩百二十韻述世美潛德以訓子孫守節四十八年崇禎中旌

嵇應聘妻黃少寡子幼苦節四十年孫永福進士

烈女浦幼知書見葉茂材八貞女傳心儀之許字陳毓華毓華卒女聞驚欲死父母守之女製道家鞋式中書一火字授其小妹比晚伺者懈投河死衣密紉不可卸雙

環繫焉陳聘物也旦日毓華母往視目一開而瞑以女
柩偕毓華柩合葬惠山繡嶂街之側崇禎中旌

張鼎烈聘妻胡未婚而鼎烈夭女年十九歸張執喪號於
墓崇禎中旌

贈推官胡俸妻虞年二十八而寡子時忠始十歲家貧族
黨屢逼辱虞不勝憤使孤爲狀自陳守節於縣官旣乃
營喪葬撫子成名崇禎中旌時忠妻母榮龔樞妻亦以
節聞

贈中書龔修齡妻劉節愍廷祥母也夫亡奉其姑至孝食
貧苦守訓子廷祥成進士官中書殉甲申難

黃汶妻楊汶早卒楊年二十有四孤六齡兩世舅姑俱在
堂仰事能盡厥職割私產以償公逋性矜飭暮年癰發
於乳未嘗袒胸以見子婦教子應元以孝聞

諸生華璠妻馬贈侍郎希尹女也事舅能盡孝年二十二
而寡矢志以終希尹次女幼字何枋如枋如疾亟歸何
守貞並以節著

高宗謙妻鄭封主事士鶴冢婦也年十六歸高二年宗謙
卒以苦節終士鶴妻母吳早寡久依於高鄭旣守志其
姪女輩孀居者並依鄭共處一室奉詔旌

烈女吳許字秦法昌法昌卒女誓不二執喪於家如婦禮

無錫金匱縣志 卷二十一
比服闋而媒至女欲引刀自盡侍婢守之遂屏粒食噴血而絕

養利州學正華白滋妾姜事詳白滋傳

侯厯聘妻殷早喪母其姑乃姨也年十八厯病卒女聞訃請歸侯執喪欲依姑以居姑以年少屢慰諭遣還乃哭於厯靈而行舁至家則已自經於輿中救之得不死復歸於侯足不踰閩十年以病卒

贈侍郎馬忠肅世奇二妾朱李事詳世奇傳又妾袁以苦節著

食死

華應鶴妻楊應鶴死於兵楊年二十九子允魁甫三歲挈之依父父無子將死謂嗣子曰姊無歸以田若干爲之贍嗣子利其有謀於族某曰姊幸少嫁之可會有無賴子攫人金謀娶婦某納其金招至舍將逼之楊夜穴屋後垣負兒出匿邱墓灌莽中飲泣不食兩晝夜族之長厚者求得之匿之他舍無賴子既失所求索金去楊乃得歸以十指自給允魁以疾盲從人授日者術養母以壽終

王節愍孫蘭妾嚴孫蘭死寇難嚴守志不二完節以終

長沙縣丞秦廷珪二女事詳廷珪傳

諸生華曠度妻王明季王與夫避兵竹塘里懼不免乃紉珠爲約密納衣袂縫中曰卽死以珠爲驗得收余骨曠度適遭疾騎突至曠度急呼婦挈少子走王行里許復還謂夫曰君留此必死掖之臥旁草舍中冀得脫畀以金曰以此與追騎可免語畢行而騎兵已至王倉卒投水被獲一騎挾之上馬王乘間解腰間帨自縊騎兵怒面斫一刀復一刀潰腦五指牢握敗禾以死越三日曠度得脫求婦不獲見一屍於草田盛暑齒腐裂所紉珠知爲婦屍年四十二

諸生嚴紹賢婢張事詳紹賢傳

劉明楨妻顧婚未逾年值湖盜縱掠將逼執之躍入井中死

呂完音妻徐明季避兵匿叢草中兵索得之挾之去不從赴水死尸流數里女猶在抱不離年二十七

華尙濂妻鄒婚未數月尙濂殉國難鄒年十九入室自經家人救之得不死苦節四十餘年尙濂從兄子廷楨聘妻費亦以守貞終

叅將何以培妻黃事詳以培傳

烈女王性矜嚴溽暑不御輕縠許字何年崇禎末所在盜

起年從之坐繫獄其家願離婚索所聘物父兄將從之
女投井中救之不食兩日死

秦之珩妻董之珩卒時謂曰負汝半生吾死勿守倘遺娠
生男善付託之可也董以死誓歲歎至取榆皮碾食之
撫子自守

貞女陳許字某未嫁夫死女聞訃割耳自誓守貞以終
國子生堵大建妾錢早寡撫孤孫正爲諸生孫正死於楚
軍錢與婦沈厲志守節四十年沈事詳孫正傳

丁建明妻劉年二十八建明死撫二孤扃戶紡績終身茹
素長子榮祖天婦陸從姑守志知縣表其閭曰兩世霜
操女適同郡劉繼美繼美亡守節依母以居

諸生華夏甯妻杜早寡撫子淳吉成進士守節五十餘年
烈女陳許字某未嫁夫死訃聞女自縊
夏某聘妻顧未嫁某亡歸夏執喪禮守志終身

郭維翰妻秦年十九夫亡欲以死殉有勸之者身有妊如
生男撫之愈於死後生子文輝甫成立而夭抑鬱死
郭誌忠妻徐誌忠早卒遺三孤家極貧或勸之嫁曰不欲
我爲郭氏人耶泣謂三孤汝輩能力田吾無憂也

副貢生過對揚妻劉對揚死苦節自厲子松齡進士
諸生高明昭妻李明昭及子綿士均死於兵李聞自經鄰

媪救之甦守節三十六年

顧虹繼妻錢婚七月虹亡遺腹子培以理學聞於時

烈婦周適江陰諸生黃晞晞父毓祺故前明遺民爲怨家所告死金陵獄而收晞兄弟籍其門周名在籍中屢求死不死會詣府當僉解吏卒呼周名周陰挾利及直趨上階右手引袂障面左手抽刃自刺血衝涌仆地夜半復活又不死知府上其狀於按察使按察仍逮之乃自經死晞就獄中述其事而邵長蘅爲之傳

無錫金匱縣志卷二十七終

無錫金匱縣志卷二十八



列女

國朝

贈僉事劉士璋妻榮早寡而貧撫二孤教養盡瘁子果遠進士先旌後封年九十卒

諸生馬瑜聘妻鄭未婚而瑜卒鄭聞以首觸火焚髮至盡泣請於母願歸馬執喪母未應卽擲身墜樓折左臂聞於馬具禮迎之守貞七十年

朱甯基妻錢寡時年二十九嚙指血書守節撫孤四字於壁以自警家貧習勤力盡於嫁娶歷三十年

張國誼妻王早寡守志五十年凡舉十三喪婚嫁事八教子元發元韞俱有成

過樛生妻周年十八樛生卒藏弃遺書見必持之慟守節三十年

貢生王玉汝繼妻秦玉汝卒撫前室子與己子課之學並有文名叔母華早寡甚貧秦割產贍之生母亦少寡迎養於家四十餘年

烈女曹武進農家女也幼失父母撫於邑西鄉朱氏因字朱氏子未婚朱病女割股以療不愈矢不嫁有欲之者強委禽焉曹度不可解衰服自經

華章聞妻曹年二十六而寡痛不欲生念兩世宗祀寄於一孤強撫之成立時舅已老每哭其夫不使舅知守節五十餘年

華章妻葉少寡遺孤甫逾歲既娶而夫婦並亡撫幼孫又天子然獨守五十餘年

諸生鄒侗妻徐年十九侗卒遺腹子振芳既就塾徐語姑曰孤稍長可從夫地下矣遂投淵死里人名其處曰烈婦河

尤某妻陸某死陸年二十八里有強奪之者挈二孤屬鄰媪撫之遂自經

許行我妻趙行我溺水死無子趙年二十一苦節六十餘年卒行我弟明雋嘗割股療母疾順治間兩使旌之

烈女席許字單吉凡子某單父子以事死於獄女聞去色服時飲泣父母別字之至嫁夕促登車闔戶自縊死

節婦秦知縣延默女適宜興湯作霖年十九而寡工於詩八歲時有句云松栢壽不花寒天葉常碧父見之曰是兒當以節稱其祭天文尤酸楚

陳氏二女俱許字未嫁一聞夫死自縊一割耳自守並以貞烈稱

朱承宇妻曹家極貧承宇死曹自穿穴負土以葬指盡腫族人逼嫁之乃託孤其姊走夫墓哀號自經其屍左臂凝血尙殷始知向爲夫割股云

方應宗妻惠應宗死遺幼女二舅與夫弟并惠之兄將令他適自經死

貞女陸許字江陰俞某某病天陸年十七歸俞守志時姑亦寡逐之歸姑自改適而女操益厲

華元運妻朱年十九守節壽八十有六元運族弟允昌及明儀妻皆朱氏年俱十九撫遺腹子同以節著元運嗣子起鳳妾楊以烈殉

朱重熙妻丁年十八歸朱越二年夫客江右死於耿逆之

金匱全圖卷之二十八
變守節四十餘年

劉憲舒妻張婚甫四月而憲舒卒哭其夫尋亦死張之妹許字秦汝舟未婚汝舟亡女時年十九聞訃自經家人救之甦守志不二人稱爲雙貞云

贈編脩諸士蘭妾葉士蘭死荆湘訃至顧二子保育豫曰冀汝成立恐不逮矣竟死之後二子同年成進士

諸生侯長源妻吳早寡父桂森東林宿儒也吳稟承其教以節著於鄉黨

諸生劉肇恆妻嚴少寡無子家極貧女歸華依之女死撫甥女嫁吳者婿又死所後子弱不能給餽粥苦節四十年

年

顧與桓繼妻邵年二十四夫死孤鼎吉甫二齡貧甚撫之成立鼎吉建祠於惠山寺塘涇與邑中貞節五十一人合祀之

曹代何妻錢年二十四夫邁危疾憐婦少錢曰他日相見還君白玉夫死矢志不渝年八十五夢夫就索白玉知將死晨起更衣而卒

司馬德大妻華德大以教授自給疾革問華吾死何依華曰從君死耳及卒華不哭既殮成服設奠闔門而入久之寂然排戶入己自刎年二十九

劉世高聘妻馮世高未娶夭馮年十六歸於劉持喪守貞
王仁法妻堵文忠允錫女節愍孫蘭婦也仁法死堵矢志
苦守後得疾戒勿藥曰吾願從夫地下耳整衣衾而歿
虞道滋妻薛治家有禮法一日命僕市瓷器款云抱琴沽
一醉終日臥斜陽薛曰一醉而終日臥是何品格終日
臥而曰斜陽豈復成語因屏不用其嚴如此道滋故名
士年三十卒薛以哀毀終

諸生華嵩祝妻陸歸華四年夫死子殤嗣子甫娶亦卒婦
某相依以節終

黃洛源妻繆方妊而夫死及生男三日殤繆不食七日卒
諸生楊夢鼈繼妻周早寡年十七與夢熊妻顧俱以節聞
談悌妾李年十九守節身不踰閫內外之別凜然不可犯
貞女華許字蘇州施某某訃至以死自誓歸於施七年卒
李茂春妻袁歸李一年而寡無子以夫兄子碧爲後碧卒
與婦黃相守以終

諸生楊光祖妻吳早寡遇盜至匿其孤免盜火其廬光祖
棺燬焉吳慟哭負遺骸出烈焰中後捕得盜乃手刃而
尸諸湖有司察其情不問以節終

丁宇凡妻潘年三十而寡有子五家徒四壁守節四十年
撫其子俱成立

虞相堯妻李少寡撫孤振華成立孫元甫無子而天嗣姪
明興爲子又早卒元甫妻朱明興妻盛俱盛年而寡與
李相依四世三孀事變迭至不奪其守

諸生秦己錫妻胡已錫卒胡年二十一延名師教子源寬
成進士源寬不仕奉母以孝稱

贈大學士嵇永仁妻楊永仁客閩督范承謨幕死耿逆之
難楊年二十三子曾筠甫七歲拮据營葬荼苦二十年
曾筠貴迎養官舍封一品夫人以壽終予祭葬永仁妾
蘇瑤青從永仁拘於獄自經死道光十三年旌

劉學理妻黃學理贅於黃未幾卒守節三十年嗣子天婦

某亦以苦節終

華士樟妻秦年二十三夫亡子夭母吳桂森孫也亦早寡
無子里中稱爲雙節秦甚貧至不舉火通文翰族諸女
多就之學

糜仲明妻徐家貧以織席爲業年二十四夫歿無子盡斥
嫁時衣營葬畢哀麻自經

許氏二女長字華炳泰次字秦某俱未笄守節

華景炫妻劉守節無子壽八十餘景炫兄景熺允斌竝早
亡景熺妻陳亦無子允斌妻秦遺腹一子娣姒三人皆
年少同處一室雍睦無閒景炫從兄景煜妻薛亦以節

著

華文燾妻楊文燾卒與妾某媼居同守以苦節稱

華學瀚妾張年二十八學瀚亡事君母黃至謹學瀚嗣子
孳貞就外傳張以織紵供之既娶婦撫其子女如已出
持家習勤以勞悴卒

浦樹裕妻陳家貧無子樹裕暴死假貸買棺以斂計無可
償自沈死眾義而槥瘞之

華樹芳妻浦歸華四月而寡年二十家人欲奪其志浦鍵
戶自縊夫柩之右面如生

華某妻鄭少寡守節子孟曾既娶天婦曹媼居共守不渝

其志

呂以成妻丁早寡而貧治家嚴整有法子茂芳時芳世芳
永芳俱以孝友稱永芳子婦吳亦孝嘗刲臂愈姑疾
顧起子妻胡年二十五而寡無子有利其產者迫之嫁胡
不從產爲所奪亦不問

秦珩聘妻侯未嫁珩卒欲歸秦守貞其舅姑固辭之抑鬱
以卒年十八

贈知縣秦文然繼妻顧文然卒撫孤莘田尙幼又撫伯氏
孝然子荷田爲子如已出守身持家以禮莘田成進士
華亥楨妻金寡時年十九生子甫七月食貧厲志撫孤振

先成立

劉毅生聘妻單未嫁夫亡奔喪持婦服撫姪爲子子娶又
夭與婦某撫幼孫底於成守貞四十二年

烈女王許字金兆年一作兆斗女年十四聞夫死卽投繯殉母
覺救之甦欲改字女投井死

孝女計居近市臥室臨街比鄰罕識其面夜有火延及之
女踉蹌曳嫂出不見母復入負母出母尙裸體蹈火入
取衣衣母烟瞇目不得出竟死於火

劉宏緒聘妻華將議婚宏緒卒華聞誓不改字以全其貞
貞女王寶守貞不字祀毘陵節烈祠

盧瑞星聘妻鄭未婚夫亡歸於盧持服成婦禮立嗣守貞
陸躍元聘妻駱未嫁躍元卒矢志以守

史起龍妻蔣年十九歸史數月起龍卒舅姑衰老忍死支
持撫嗣子成立

張瑞昌妻丁年二十四夫亡舅姑相繼歿丁營葬如禮撫
二歲孤旣成立而天復撫孤孫苦節四十餘年

蔡嘉瑞聘妻張夫亡守志以貞壽終

陳德浹妻何早寡家貧歲祿竭力奉姑自食糠覈榆皮度
日苦節歷數十年

華毓芳妻殷年二十四夫亡三世四喪竭力營葬撫從姪

爲嗣紡績自食茹苦以終

知縣贈布政使秦瀾妾諸年二十八守節甚貧撫孤樹穀
爲娶婦婦又早歿撫其孫雄飛成進士諸始卒以雄飛
官布政使贈夫人

虞銓妻吳銓家貧訓蒙於外吳奉養舅姑甚謹夫亡遺腹
生子佐撫之成立佐舉人

虞道揚妻吳事孀姑誠孝夫亡子官臬纔五十日撫孤守
節四十餘年

華彥松妻張彥松病臥久張主家事舅姑卒彥松相繼亡
遺孤三歲張念三喪未舉竭力營葬孤旣成立乃迎母

終養於家

全煒繼妻陳少寡子尙從叔氏外學日不再食忍饑紡績

宗黨稱賢

秦雙峯妻虞以德稱事舅孝舅弟貧無依患膈疾虞請迎
歸調治先意承志得舅之歡心

夏誠明妻施力貧養姑每具饘粥別置一器以奉而自食
野菜不使姑知

浦漢章妻尤漢章亡以節著子瀛婦周姪汾婦陳俱盛年
而寡守節皆如尤尤父聲玉前卒母毛庶母張依尤以
居皆以苦節稱

烈女王許字陳含章將婚含章暴病卒聞訃欲歸陳度父
母不聽不敢言絕粒七日死

華南征妻周年二十八而寡遺孤佩文甫四歲誓守節佩
文既娶而夫婦相繼卒苦守五十七年

竇遠妻周年二十五而寡孤起鳳甫五歲周欲殉舅姑持
之慟曰予家三世單傳此呱呱者血食是賴迺受命事
舅姑至孝撫孤得成立無恆產取給於十指以壽終

孝婦仇斌妻某事詳斌傳

朱肇瑞妻毛少寡遺孤甫一週事舅盡孝夫柩未殯鄰火
延及毛撫柩哀呼火旋反迺力營葬事

趙儒琮妻任夫亡奉孀姑五十年相依度日營葬舅姑及
夫三棺與子躬親舂鍤哀感路人

孝女陳嘗割股療親疾又刺血寫經祈父母壽守貞以終
翰林杜詔爲詩紀其事

陳耀聘妻趙未嫁而耀亡歸陳守志撫夫從子爲子教之
有成

烈女姚許字虞儀九幼育於虞未婚夫亡自沈死

嚴滌會妻黃滌會婚時已得狂疾八年卒黃猶處子也事
載馬翀江夏吟

唐義溥妻邊年十九夫亡矢志撫孤成立事姑孝乾隆十

六年旌一時紳士俱歌詩以贈

贈侍講鄒辰策妻華適辰策一年而寡撫嗣子升恆成立
終身不出閨戶惟聞紡績聲備歷艱辛升恆貴已不及
觀升恆子稷妻張亦少寡撫孤奕孝及奕孝登第迎養
京邸布衣蔬食如平時

贈知州楊希曾妻侯希曾卒無子侯厲志以守撫嗣子潮
觀成立潮觀見文苑傳

吳欽諧妻黃嘗割股愈父疾少寡守志以節孝稱
顧宓妻尤宓卒尤矢守不渝教子成立孫趙炳成進士早
卒有女年十二子甫暮女曰我當保抱幼弟常相依矣

終身不字

敖椿齡妻趙早寡以孝聞割股愈姑疾

虞希仁繼妻舒少寡撫孤際明成立選拔貢生際明早卒
無子有女適施元維而寡依舒守節舒卒女無歸因卽
惠山虞仲祠廢址結茆以居與庶母張相守女歿張獨
居時稱一門三節

孝女殷舉人夢高仲女也夢高無子女侍養不嫁以鍼指
爲嗣子脯脩夢高謁選京師女密購參朮貯行篋中母
歿寢處柩側三年夢高卒於山左迎櫬郊外營葬盡禮
華瑞文聘妻蔣蘇州人瑞文歿歸於華事姑孝家極貧族

有義田卹米謝不納或欲爲之請旌亦不應

陳尊三妻浦年十六歸尊三尊三已抱羸疾密許從死尊三言於母而歿母於是與婦同寢處越日伺守稍懈浦卽自經死

徐德隆妻蔣少寡家貧茹糠教子年逾八十而卒

袁浩聘妻張未婚浩卒女年二十五欲歸袁父母察其志堅從之事舅姑盡孝守貞以終

華鳴皋妻劉鳴皋疾嘗割臂和藥以進無何鳴皋歿遺二女賽英賽珍俱幼族人餽之錢米不受一口見屍浮水面則劉及二女也衣上下聯紉不可解有司旌之侍郎

秦瀛爲作傳立石

吳奎煥妻湯年二十四奎煥卒勺水不入口母勸慰勉進飲食服除設祭迎母至屬以幼女夜闔戶自經

司馬如山妻華夫與舅相繼歿遺一子痘殤痛絕自沈於河鄰有援之者給云澣而失足也越二日縊如山靈几之側年二十四

華某聘妻徐某死矢守不字父母從之

陳某聘妻諸未嫁夫卒父母欲改字女不從依兄以守黃曾勸聘妻莊訃聞誓以死殉歸黃執喪哀慟成疾卒金某妻喻年二十二而寡遺孤三歲一尙妊勤苦操作或

勸之改適喻曰如此何待今日

許某聘妻喻未笄而某死守貞足不踰戶茹素終身

贈知縣秦恬然妾安未嫁時嘗割股愈親疾既寡年少無出欲遣之誓不去全節以終

張卿冠聘妻陳卿冠航海死女矢守貞父母爲擇配絕粒

七日迺從之終身蔬食以貞孝聞

車某妻胡某病卒胡絕粒八日不死遂自經

周鴻儒妻浦婚未周夫病亟謂浦曰汝年少無子我死勿守遂卒浦欲殉舅姑勸之乃止服除父兄又欲奪其志

浦拒益堅以全節終

貞女華許字長洲施塏塏卒歸施守貞

宣醕衷聘妻周醕衷有厲疾年三十五未婚疾旣篤使媒告曰吾久負此女可速嫁周不從醕衷死歸於宣撫姪爲子卒全其貞

秦中威聘妻顧年十三失母卽育於秦未婚中威卒索斬服號慟欲絕守貞以老

董樹臣妻王年二十六而寡事舅姑庶姑孝謹宗黨賢之知縣旌之曰節孝兩全

過芝妻浦芝早卒浦茹苦守節兩世舅姑皆在生事死葬獨任之撫一孤成立

曹某聘妻王某幼慧年十九卒王聞訃早起以其衣披所坐牀背投井死少某一歲

章宏志妻高年十九而寡遺孤甫兩月家無恆產老屋一間撫幼子勤苦自給母章氏亦早寡相依以居

孝女雷性純至願侍父母遂不字家貧奉養取給鍼指終其身

周順卿妻錢年十九而寡無子一女在襁褓越二十餘年依贅壻以終

談宜聰聘妻秦未婚宜聰卒守貞二十餘年秦某聘妻龔性至孝某卒歸秦守貞

高廣閭聘妻顧年十六廣閭卒歸高守貞家甚貧父母子之田五十畝顧不自私悉以其入爲舅姑膳後舅姑相繼歿喪葬如禮族人云女六十以前無得識其面者

曹濬聘妻華濬卒奔赴喪次成婦禮設榻柩旁持齋以終強烈妻劉進士宗熹曾孫女適烈生一女年二十四烈死家貧藉紡績以食乾隆十七年歲饑舅某鬻其居挾貲往他縣不與劉一錢劉攜女歸母家母亦貧有鄰媪諷劉改適母諾之劉知而密紉其衣投河死

王某妻楊年十八而寡遺腹生子撫之成人見四孫而卒顧炳妻施國子祭酒棟高婦也炳本生父極高棟高喪子

以炳嗣炳卒施年二十四能持家明大義棟高著春秋
大事表等書無剗劂資施以節儉所蓄刊之行世姑患
目疾甚劇施舌舐之遂復明終事喪葬成禮極高長子
燦早卒妻楊守志如施以節孝稱

殷輅妻華瑤希閔女未嫁時割股療母疾既適殷醫奩具
爲翁償宿逋居貧藉鍼指以養著有繡餘詩彙

孝女秦父欽亮母章素有疾將受聘女泣請曰母疾若此
兩姊又出嫁女去誰事母者父惻然遂從之父母卒依
戚朱節母以終

孝女孫旭媿父以疾廢弟天女矢志不字以鍼帶給養能
詩畫兼知醫知縣旌其門曰貞孝有峽猿吟草

烈女蔡昭姐性端飭不苟言笑里人某以語污之自縊死
華序和妻葉年十八婚甫三月序和以痘亡矢志守節奉
姑孝謹撫姪藻爲後姑卒殯葬以禮藻諸生

顧道華妻朱婚未逾月道華死舅姑俱老藉鍼指以奉膳
節餘金爲叔氏置妾生子以延宗祀

秦坤敬妻徐年十八而寡事姑孝姑病日徐朝夕以舌舐
之迺復明撫八月孤讀書有成

秦倍聲妻殷倍聲有羸疾婚兩月而卒殷欲以身殉以舅
姑年老始不死撫所後子既授室而子婦相繼卒遺孫

在抱以苦節終恆謂戚黨曰老婦終身一處子也其姊鳳聲妻華年二十三而寡撫姪又文爲子娶婦倪年二十又文卒兩世三孀俱以節著

周勝瑞妻張有志操無賴子某誣以污言張忿激自死以明其貞

秦嗣聲妻季嗣聲卒季年二十五孤子甫週歲撫之旣娶子婦俱卒無出茹苦終身

朱燦聘妻支年二十四未嫁燦死歸朱守貞姪應竣後之有田二十餘畝奉姑撫孤皆是出姑卒應竣天議他嗣應竣本生父文耀利其產與族人材任謀曰立嗣以母

無母何子脅之嫁不從縱無賴子擾之至裸體入支避匿益堅文耀數搆事擊支又給傭人黃姓強娶之碎其鬮劫之出支急取翦自戕鄰里救之不死復投淵遇弟錫昌告以實訴之縣文耀私交府通判某詣縣言支有別情知縣鞫之支解衣求刀剖胷自明乃遣嫗驗之果室女材任文耀之逼脅皆吐實重懲之而爲支定嗣并作傳表之知縣爲青田韓錫胙

華扶九妻杜扶九力學早卒杜年二十七無子紡織自食妯娌皆敬事之

侯惟興妻楊年十九惟興卒遺孤在襁褓伯叔利其產欲

嫁之楊不從遂鬻其產又賣其紡具守益堅撫子成立
王印川聘妻虞年十九印川死虞聞絕飲食晝夜哀慟卒
殯歸王氏與印川合葬以慰其志

孫鎮聘妻李未婚鎮卒李聞訃歸孫執喪撫姪爲後守貞
以終

朱建立妻惠年二十五而寡遺孤甫二歲惠苦守足不踰
戶舅姑相繼卒喪葬盡禮子多疾督之甚嚴卒以成立
烈女程許字康叔健叔健卒女年二十一手製衰服歸於
康朝夕哭柩側送葬歸不食死

諸生華苻繼妻高年二十五而寡素奉忠憲家訓以禮法
自守撫孤紹濂學成爲邑宿儒
烈女王許字周士新年十七方議婚士新訃至闔戶自經
歸於周合葬焉

魯國安聘妻胡國安死聞訃矢志守貞裹衣潛易純素一
日有行媒者胡覺之乃手鈔邵文莊單貞姬祠堂記置
妝臺上兄見之告於母曰妹志堅不可奪遂勿再字事
父母盡孝父卒母多疾奉侍惟謹守貞三十餘年卒時
母年八十餘猶以不能終事爲憾

國子生秦文釗繼妻陶年二十五文釗卒無子撫姪瀚爲
子夫婦又相繼卒撫孤孫成立既娶而天婦楊亦以苦

節終

國子生秦鼎銘妻蔡工部司務德晉女也年二十九而寡
蔡少奉家教事舅姑誠敬撫遺腹子景范爲諸生

顧江妻楊婚二年而寡無子女在襁褓守節不渝事舅孝
撫姪爲夫後教之有成

龔召棠妻薛年二十八召棠卒鬻衣飾以殮遺孤甫三歲
家貧常不具食值歲歉有恤之者辭不受

顧盈科妻吳年二十九盈科卒越十五日舅亦死有遺姪
勉爲經紀喪事家貧無食依母以居撫孤子得成立

孫宋郊妻宋宋郊嘗割股療父疾早卒宋年二十二孝於

姑紡績度日撫孤有成

烈婦章歸績溪程某程病革許以同死既卒勺水不入舅
姑勸之曰吾與夫有成言矣以哀毀咯血不止卒

華麟桂妻尤寡時年二十五遺孤順元甫五齡貧不再食
而督課不懈操作勤儉以織紝餘買田數十畝宗黨皆

賢之

孝女楊父觀潮無子女願事父母以代子遂不字家甚貧
習爲刮絨花易粟以養父卒奉母十指告瘁得疾泣告
姻黨屬母終身事而卒

恩施縣典史華兆椿繼妻楊兆椿在官入山捕盜失足墮

澗死楊年二十六歸櫬營葬守節二十七年

曹澄源聘妻華未婚而夫卒華赴喪撫尸慟尸亦流淚守

貞以終

張錫聘妻朱未嫁而錫死訃聞矢志必死恐有伺守之者

急收淚言笑自若給母嫂他出闔戶自經

施成憲妻潘年二十六而寡舅宏任為萬全知縣既罷歸

家益貧姑性嚴潘侍奉誠謹茹苦守節以終

吳鴻章妻陳鴻章死陳矢守不二舅姑已老孤子甫二歲

俯仰賴之

朱子遠妻陳甫婚子遠卒或勸之嫁不從自刎以殉知無

錫縣吳鉞建坊表之曰女中鐵漢

王元楨妻華早寡無子有二女貧不能養有以言微動之

者華嚙指斷寸許言者駭而去二女嫁以斷指示之曰

婦道當如是

范介玉妻楊介玉為讎毆死讎以利餌介玉父欲寢其事

楊自詣邑訟冤讎論如律里有無賴子逼就之楊以刀

自斃面卒全其節

李某妻丁年二十一而寡遺孤三歲撫之既成立又死苦

守以終

貞女周許字某以事他出無歸期某家請於周曰子不肖

不可以辱君女將改字女曰遇人不淑命也請依父母以居後營父母喪葬又與弟婚悉女一人任之

徐汝楫聘妻郁汝楫死截髮自誓迺歸徐事舅姑能盡誠孝汝楫弟妻某亦早寡同居守節

凌浩然聘妻馮未婚浩然卒慟哭歸凌事姑惟謹姑死鬻衣飾以葬

華弦妻朱嫁未踰月而寡姑性嚴能曲意承順苦節五十年撫子江涵爲諸生

華景妻沈景有療疾婚未一年而死沈絕粒姑曰爾妊男也以承宗祧可無死既產女又不食百計防護得不死

沈有姿蓬垢不自飾或勸之改適且窘苦之志益堅貧無食饑餓死

陶子範妾沈子範卒沈年二十無出嫡謂之曰守節撫孤吾事也不可以累汝沈泣請願受役嫡死兩孤賴以成立

黃兆鵬妻秦兆鵬死哀慟幾絕舅姑謂之曰吾等皆老汝死易立孤難勉爲其難者秦受命嘗割股療姑疾既卒喪葬以禮撫孤周僅督教甚嚴爲諸生有文譽

李瑞隆妻葉瑞隆卒撫三月孤既成立爲授室子婦相繼亡遺兩稚孫又撫之荼苦備嘗以壽終

朱遇時妻秦遇時以疫死遺七歲孤家極貧秦苦守撫孤成立其孫烈芳童年嘗割臂以療父疾

王南妻朱南卒朱年二十二子甫四歲人謂汝微年又少可勿守朱誓不他適事舅姑以終

朱晉妻陳年十八而寡以姪爲子子既舉孫而子婦俱亡撫孤孫甫娶又亡孫婦華年十九孀居相倚陳既卒華獨守營地以殯三世喪尤稱苦節云

李仲慶妻楊年十九歸李未暮而寡撫子有成父無後迎養之有節孝名

錢紹業聘妻華未嫁紹業卒斬衰往臨其喪守志終身華母薛亦節婦教子枋成名爲宜賓知縣以年三十一而寡格於例不得旌

國子生錢瀛士繼妻楊盛年而寡撫前妻子如出腹次子世模早卒婦周守節如姑瀛士世模俱尙義而未竟其志楊與周相繼成之置祠田建義莊先後旌

朱郡蒼妻浦年十七而寡無子易簣時郡蒼屬浦立後夫弟萬成生子克照撫爲嗣既娶克照天浦泣曰余負夫屬矣復嗣從姪子紹堂爲孫與婦錢共撫之守節四十五年萬成繼妻何與姪克熙妻王皆少寡一門四節鄉黨稱之

侯作梅妻秦嫁時作梅已病革月餘作梅卒秦欲殉勺水不入其姑以米瀋進勸慰之越數月竟死

朱震妻倪年二十五夫卒遺孤方數月家甚貧俯仰皆給於十指苦節六十年

徐起鵬妻華年二十二起鵬死欲絕粒舅姑慰之曰子死婦存如未死也舅姑有疾潔誠露禱奉湯藥惟謹愈則祭告於夫之靈以姑喪哀毀致疾卒

諸生秦調鈞妻胡原籍武陵布政使獻徵孫女也少聰慧通書史調鈞疾亟謂胡曰今累汝矣語畢死胡以首觸柱流血被面姑曰如吾老子幼何胡涕泣受命子二人

長雷為諸生

孝女錢蘭父卒母病女以母無依矢志不字母有所維持得永年

烈女孫如姐本須氏女幼育於孫事母李以孝聞母死自縊以殉鄰婦救之甦夜有里中無賴子李某潛入其室欲污之不從即自刎有司得其實誅李某孫以貞烈旌秦之樞妻楊年二十六之樞卒絕粒飲七日幾殆母勸之勉進饘粥嗣姪燾為夫後乃專意撫孤舅姑已前卒依母以居母秦早寡秦長女適高亦寡母女二孀同志以守

鄭廷照妻華婚一月而寡撫從姪爲子家極貧喪葬婚娶皆十指所出苦節五十餘年

孝女楊早喪母弟天矢志不字事父與繼母誠謹以貞孝稱

施振雅妻嵇年二十六而寡撫伯氏子爲嗣事舅姑孝敬待家人以慈和子孫有過示之意未嘗一言呵斥親見五曾孫三元孫守節六十年

張象一聘妻陳將嫁夫卒泣請父母願守貞父母卒依兄以居

楊榮益聘妻沈未婚夫亡女誓以死從恐傷父母心少忍之後父母卒曰可行吾志矣遂死之

夏之龍聘妻華未婚之龍死歸華守貞不渝其志

沈惟和聘妻郁年十九聞惟和訃歸沈執喪踊泣盡哀

周啟瞻妻王寡時年十九哀慟欲以身殉方有妊家人勸之不死遺腹子又殤撫姪爲後苦節五十年

孝女倪早喪母父欲嫁之女願終事父遂不字奉膳皆鍼指出父卒依姪以居

欽名邦妻劉寡時年二十五守節四十餘年姪維明甫娶卒無子婦矢志守不二撫嗣子淮爲諸生

南籠知府張鳳枝妾冉鳳枝先有二姬又納冉冉之父母

屢構事鳳枝怒遣之去誓不他適居貴陽不相見者數年而守益堅鳳枝以事被逮入獄二姬去惟冉留求一見作死訣以理論之始不死居澠陽以待鳳枝戍伊犁寄言於冉有姻黨爲儀睢分守往依之既至署有挑之者冉正色避懼不能免縊於寢年二十七

吳子龍妻徐年二十一而寡無子家貧姑老徐矢志紡織事姑能盡誠孝

陳子山聘妻姚年十七未嫁子山死歸陳守夫喪事舅姑惟謹以全其貞

楊又鳳妻孫寡時年二十七人謂其舅曰家貧歲歉胡不嫁新婦孫聞潛自經死

孝婦袁永烈妻蔡姑病亟惟乳可救蔡甫舉子乃寄其子於母家專意乳姑姑疾瘳事姑盡瘁以終

施莘傳聘妻吳未嫁而莘傳卒吳誓志守貞五十餘年宗黨稱其賢

知縣薛肇熿妻周少有至性母早卒在室時嘗割股和藥療繼母疾人稱其孝子泰階舉人

符德宗聘妻高年十九未婚而德宗卒歸符成婦禮茹素終其身

孝女倪父廷堅家貧女自矢願終事父母遂不字以鍼帶

佐膳兄在外嫂卒爲撫其子守貞五十年

王持衡妻黃持衡游幕於浙卒孤子二俱幼家素貧黃茹苦三十年舉兩世四喪營葬如禮叔氏早卒撫其子女教養婚嫁如己出

張天五繼妻倪早寡撫前妻二子如腹出旣授室而虞鏞婦鄒禹錫婦曹又相繼而寡兩世三孀相依倚以苦節終

孝女唐素母早卒父年老無子女矢志不字以事父貧甚賣畫爲活家在第一泉側冠蓋往來咸知有唐孝女云吳西安聘妻丁西安素有疾丁待年至二十七西安死歸

吳執婦禮織紵自給守貞五十年

國子生楊陞莢妻劉華亭教諭寅賓女也有至性明禮教年二十八而寡茹苦以守撫孤紹基成立爲蘇州訓導楊殿光妻錢年二十四而寡撫姪永基爲授室守節終

國子生孫國顯妻陳國顯銳於學得疾謂陳曰以二親及孤累汝卒陳年二十五子保之甫四歲陳孝事舅姑惟謹姑病調湯藥滌裙履不假手婢媪撫孤保之成立以樂善好義昌其家咸以爲節母之教云

孫文岸妻秦寡時年二十七遺孤餅尙幼紡織自食餅旣娶又天婦顧依姑以守兩世孀居不渝其志

胡壽山妻過年二十四而寡遺孤三歲殤家貧有勸之改適者父母意惑之過聞闔戶自經

鄒汝珩妻徐年二十六而寡子印綬未週歲事姑撫孤達大體印綬舉人汝珩妹適國子生楊衡于歸時已不逮事舅姑年二十八而衡歿時歸事母嘗與徐同侍疾夜分聞母喚亟起失足折左臂子晬諸生

尤戒三妻周年二十四戒三卒無子家極貧以鍼指所入奉舅姑膳姑喪明負之行冬畏寒抱臥以溫之舅姑俱享大年至九十外撫姪楠為後以節孝稱戒三弟緘三妻惠年逾三十而寡亦以苦節著

倪繼繹聘妻顧未婚而繼繹卒女聞訃哀慟歸倪守貞

王濬聘妻虞濬夭虞斬衰往臨其喪哭泣嘔血未幾歿

孝女尤以父母無子守貞不字居惠山文簡祠側祠故尤曾祖身滋建也年八十餘始歿

孝女胡素娥不字以事母卒全其貞

錢會瀛妻陸年二十五夫亡撫孤孤又殤慟幾絕戚黨勸之得不死守節三十餘年以從姪熿為後

贈知縣陶瀚妻鄧年二十八瀚卒家貧撫孤錕成立舉於鄉為羅山知縣未幾錕又卒守節五十餘年

張沛然聘妻陳未嫁而沛然卒女聞訃絕粒母勸慰之夜

自經家人救之而甦遂歸於張舅姑又相繼卒喪葬如禮守貞以終

錢培妻楊培以力學致羸疾卒楊年二十一遺孤甫週月又殤痛絕欲自盡躍樓下擲地父母亟救之得不死撫姪元鎧爲後以苦節著

烈女俞杏貞贈編脩英女許字高郵拔貢生金蘭婚有期蘭歿於京師杏貞聞訃絕食死

俞垣聘妻楊垣夭歿於京師楊聞訃哀慟死

金大鏞妻蔡大鏞病瘵死越數日蔡亦絕食死年二十三孝女邵蘭芳性貞靜年及笄有行媒者蘭芳泣告父母願不字以終事父母從之晨夕侍養終始不渝歷數十年而卒

陳元燮妻朱婚未一年而寡姑老且病終事以禮姑既葬設奠於夫之靈曰子婦之職盡矣遂絕粒死

楊開元妻張年十八歸開元既寡遺孤在襁褓依叔氏鼎元度日不數年鼎元死與姊周紡績奉姑以迭舉喪葬產盡去周挈子女依母家而張奉姑僦廬以居與周終事惟謹張之子既授室三年而卒遺腹生孫矢志共守婦亦安之逸其姓

陳元長妻袁年十六歸元長數月而寡遺腹生子貧無倚

姑憐其少勸之嫁袁曰烈女不更二夫況有孤可守耶
爲人賃春夜則紡績達旦孝養其姑以壽終子成立

張柔中妻吳幼育於張舅家昌教子嚴柔中以力學致羸
疾既病亟而婚未彌月而寡時吳年十九父母以其猶
處子也議改適吳矢守不從作淨室垣其四圍而鑿一
窟以進食吳道裝居處其中年六十始毀垣出家昌妾
袁年十六而寡亦以苦節終

華作羹妻孫年二十八而寡無子舅年老貧不具食孫少
讀書通解文義里黨中女弟子從之以脯脩供舅甘旨
舅卒斂葬如禮無姪爲子底於成

朱德丰妻馮于歸時德丰已得瘵疾未匝月而卒馮時年
十九誓以死殉德丰鮮兄弟舅衰老迺以仰事爲事痛
舅與夫無後鬻產爲從叔封置妾以期得子而卒無子
奉粟主於宗祠置祭田以祀之

蘇尙仁聘妻黃年十九未嫁尙仁卒聞訃往哭其夫持婦
服事舅姑克盡孝舅姑歿貧無食迺歸依其兄卒全其
貞

孝女查父某病瞽母顧素有疾女侍奉惟謹及笄將議婚
則以待弟授室辭弟既娶女曰新婦未諳姑性願終事
不字歷數十年按察使汪志伊表其閭曰安貞全孝

華淮妻安年十七歸淮未暮而寡截髮自誓以守嗣子申錫又早卒婦謝事姑撫孤以節孝聞

王文桂妻殷殷之姑故甯國知府嵇璠家乳媪遂依於嵇文桂歿嵇之僕隸有挑之者殷毀容自刺其目姑病事之至孝閱十餘年姑歿以帶繫門屈戌上自經死

金啟東繼妻華淑貞婚未五月啟東卒誓以身殉僕婦守之惟謹越日給守者出鍵戶自經死年二十四

黃孟曾妻顧幼習孝經列女傳通曉大義二十五歲而寡舅姑俱老遺孤在襁褓仰事俯育心力交瘁守節三十年

蔡曜妻陳年二十七而寡事姑孝資紡績以膳教子培成進士官晉甯知縣迎養於官舍

孫藹堂妻顧藹堂早卒舅年老疾革私割股和藥以進尋愈後顧病遍體腫惟所割處如常姑以手摩詢之始言其實

張聖開妻李年二十聖開卒無子李請之族人爲立後守節三十餘年

劉公順妻錢年二十六公順卒家甚貧紡績自食有勸之改適者錢不從撫孤成立以完節著

贈中書徐雲錦繼妻陳年二十歸雲錦越四年而寡遺孤

無錫金匱縣志 卷二十八
時俊甫三歲家貧織紉爲活舅姑歿葬祭以禮守節三
十年孫煥進士官中書

顧廷燹妻孫廷燹客廣陵歸遇颶風覆舟死孫年二十五
舅姑已衰老子女俱幼孫生事死葬教養婚嫁俱有條
理苦節四十五年

華萬濟妻錢年二十六而寡苦節四十二年子有本亦早
卒婦陳守節如姑有本子瑞林聘妻曹幼育於陳瑞林
未婚而游學久不歸無踪跡處姑欲遣之曹曰吾育於
此有年矣孰不知爲華氏婦紡績養姑守貞以卒

烈女王蘇州人幼字方三才既長而女父悔之潛鬻與富
室爲妾女知之闔戶自縊死三才聞亟往視女所繫環
珥方聘物也歸葬其柩以慰其志

王龍觀妻繆十九歲歸龍觀越三年而寡舅以年少無子
且無養欲嫁之謬聞哭於夫墓歸自縊死

秦嘉文妻支年二十嘉文卒姑老病相繼死家極貧鬻所
居室營葬地而結茆墓旁以居遺腹子庭賢既娶夫妻
支年二十四無出撫姪爲後姑婦相依俱以苦節聞
何閭然妻龔年二十四而寡舅早卒姑龔以苦節著閭然
既病亟屬善事母侍奉誠謹不少懈嗣子書田教之學
補邑諸生

陳敏德妻虞盛年而寡遺一子二女俱幼哭其夫嘔血失聲遂得瘖疾家貧無養糠粃雜野菜爲糜食之以爲常苦節三十餘年

周公憲妻董早寡而貧或諷之去董不從以勤儉所節爲子震陽娶子與婦復相繼亡煢煢獨處年八十卒

張炳翼繼妻史炳翼死誓不獨生視殮後絕粒五日不死夜縊於柩旁

朱欽妻楊早寡撫孤緒成旣授室緒成得瘵疾卒婦錢守節如姑兩世孀居錢侍奉誠謹姑卒喪葬如禮嗣從姪聯芳爲夫後以節孝稱

錢大才妻顧年二十三而寡事舅與繼姑克盡誠孝舅姑相繼卒幼叔松元甫三歲顧哺養之旣長爲之授室以松元子珏爲夫後

國子生嵇承恆繼妻楊年二十一歸嵇二年而寡遺腹子文煥撫之成立守節二十七年

國子生鄒本豫繼妻劉婚四月本豫赴京兆試久不歸客死於黔間訃哀慟歸櫬營葬以禮守節四十七年

華伯瑞妻周年十七歸於華越二年而寡家貧紡織度日足不踰閫者五十年

陸升妻包年十八而寡極貧性孤介常忍饑不以匱乏告

人苦節以終

許潛龍妻張年十九潛龍卒無子撫從姪浩爲子教養成
立守節五十五年

吳俠君妻黃生子甫三月而俠君病亡子又殤家既貧舅
性疎略不任事黃痛吳氏無後請於舅盍買妾爲嗣續
計舅曰爨下且無薪何言是黃悉出所有簪珥售之爲
置妾有妊五月而舅卒黃毀痛之餘日祝其男果生子
名曰鑄妾遂去鑄生僅百餘日貧無乳媪黃子殤後乳
已絕晝抱之飲以薄糜夜呱呱泣不得已時以乳就之
數日復生潼喜曰天之不絕吳氏也黃自翁亡後無依
倚勤於十指以給衣食鑄既壯爲授室葬舅姑與夫柩
以壽終

錢以鎮聘妻華未嫁以鎮以中暑得暴疾卒華聞訃欲歸
錢守貞絕粒者累日父兄知其志堅告於錢以禮迎之
易衰服成婦禮舅萊生前卒繼姑倪早寡相依以居侍
養惟謹撫從姪宗望爲後苦節以終

謝良榕妻周年二十八而寡無子女適周亦早寡母女相
依以居

孝女倪文秀父承雲早卒母呂少寡鮮兄弟伯姊旣嫁文
秀年及笄矢志不字紡績養母所居宅旁買地一區爲

圃菽蔬以供既終事母爲父立後年七十餘卒

諸生鄒容成妾高年二十六容成卒依君母吳矢志不二
守節以終

華允謙妻陳年十八歸允謙未週而寡誓欲死家人相戒
日夕守之不得閒長齋繡佛守節五十年

倪廷妻陸年十八廷卒屏戶獨居姻黨讌會謝弗往茹苦
以終

國子生陳寶輪繼妻顧盛年而寡以禮自守主家政禦外
侮家故豐置義田以贍族人之貧者宗黨賢之

錢鏞聘妻華將議婚鏞卒華聞欲歸錢守貞家人阻之不
從舅姑嘉其志禮迎之持婦服如制

范康恆妻趙事姑孝姑患膈幾殆醫禱無效趙割股和粥
糜以進姑疾瘳飲食如常享大年以終

國子生丁權聘妻馬玉姝未嫁聞權死割耳自誓其姑憐
而迎之歸旬餘得咯血疾不肯治遂卒年十八時嘉慶
十一年郡人劉逢祿書其事

過恆基妻錢少寡舅前卒家極貧錢事姑至謹晝夜紡績
以具食而自屨糠覈匿不以聞里黨咸稱其節孝

楊某聘妻劉球琳未嫁某卒聞訃欲奔喪或勸阻之卽以
守貞請於父母遂不字年五十六卒

孝女吳玉堂父母有疾兄不慧女矢志不字以鍼指爲菽水資扶持抑搔旦夕無倦數十年如一日

周洪璋妻朱早寡家極貧姑老子幼織紉爲食苦節五十年孫光啟甫娶而亡婦榮依朱以守光緒聘妻談幼育於周末婚光緒天談衰服成禮以哀慟致咯血不止卒許漢武妻馬年二十二而寡有妊甫三月姑前卒馬無依迎其母同寢處旣而遺腹子殤迺鬻奩具爲舅娶繼姑黃生子興宗馬與繼姑共撫之旣長爲授室而以興宗子廷棟爲夫後

秦鼎梅聘妻潘年十八將議婚鼎梅卒潘衰服往成婦禮

嘔血而絕

周思孝妻王年二十一而寡遺腹生女舅姑已前卒祖姑趙年老且病家甚貧織紉以具膳營三世喪心力交瘁以苦節終

糜文元聘妻賀文元病卒聞訃絕粒母謂曰母老弟幼汝未可死女受命事母至孝弟旣授室請歸糜行廟見禮歲歉得食盡以奉舅姑而女常忍饑

沈震元妻楊事繼姑黃盡孝黃有痼疾侍奉藥餌越七年無倦繼姑卒楊以哀毀死震元亦義終身不娶

侯秉銓妻華秉銓體素羸以力學致疾卒遺孤甫周歲華

矢守自勵事舅孝割股者再孤既成立又早卒華與婦同撫孤孫苦節五十年孫桐進士官至吏部侍郎

鄒邦彥妻華舉人樽女年二十邦彥歿痛絕以及自刎姑急持之傷二指絕粒飲七日姑婉勸始進米瀕以哀慟致疾未幾卒

嚴萬隆聘妻榮國子生錫璋女將婚萬隆卒聞訃自經家人救之甦遂矢守祖父母憐其少欲改字女聞之赴萬隆墓號慟以首觸地而死年二十一

趙鎬妻孫年二十四而寡舅姑衰老孤子璜在襁褓仰事俯育茹苦以守舅姑相繼卒喪葬如禮璜亦娶於孫年二十九而寡事姑孝姑婦共厲清操撫孤孫得成立

許文燕妻蔡御史維鈺女夫卒事孀姑潘孝謹守節二十餘年卒初文燕祖叶熊欲置義田贍族後子三慶孫文燕皆早卒蔡以田四百畝詳請建立義莊用承先志舉人秦濂妻張年二十歸濂姑病密鬻奩田四十畝爲參苓費翁姑不知也年二十三濂卒於京都張聞號慟淚盡繼以血守節五十年壽至七十八卒

楊錫贊妻馬師班錫贊世父夢槎殉節金川立祠未就馬脫金釧助成之少寡守節三十餘年卒能詩工山水胡德先繼妻徐德先歿年僅二十一無出前室子逢源方

七齡教養兼至得成立嘉慶五年旌

薛世琛妻許世琛卒許年二十九子錦堂甫二歲教育成立許能詩著有十笏樓詩橐

華翰才繼妻倪適華五年而寡遺腹生子藜照家貧恃十指以給族有義田議資之不受藜照就學族爲具贄又卻之後藜照補諸生授經養母將具狀請旌倪止之曰守節乃婦道之常何旌爲旣卒逾年始旌顧皋爲之傳廉永清妻朱年二十三永清卒事重闈以孝稱訓子成立捐田十二畝爲義塚

國子生陳鳳階妻秦父家貧以女紅奉大母甘旨年二十歸陳舅歿鳳階哀毀疾革秦露禱請代膝盡腫卒不起因姑吳悲痛過甚秦惟飲泣不出聲終身屏衣飾操井臼撫兩孤得成立年六十六卒

錢朝鈺妻謝年二十夫卒吞金絕粒誓不欲生翁姑諭以撫孤大義守節三十餘年學政辛從益以苦節徵規額表之

徐學謙妻顧年二十九學謙卒顧侍奉孝敬翁姑忘失子之戚撫孤教養備至家庭內外整肅守節二十餘年錢炯妻黃年二十一寡遺孤立基甫六月欲以身殉瀕死者再先是炯生母沈亦守節撫炯成立黃念身死則姑

無依且如遺孤何遂勉起操作道光七年旌

孝女孫適經歷秦璋女父乏嗣迎母同居母病且瞽女割股和藥進病立愈日復明者數年

秦民瞻妻董年十六母宋患對口疽醫束手董割股煎湯母竟愈洎歸秦姑患瘡痂瀕危董割股如前亦愈

顧宏昶聘妻張素五景泰女年十八婚有期而宏昶歿女絕粒誓殉父母勸諭之乃去簪珥茹齋素事親孝敬守貞五十五歲卒旌

沈玉成聘妻過未嫁玉成卒女父士安匿不使聞女知之飲泣不食父憐之不改字女事父母以孝稱父母歿依

其弟以終身

強啟文妻薛啟文卒薛年二十三遺腹舉男教養成立事姑孝敬妯娌敦陸守節二十五年卒

平鶴嘉妻過年二十三歲鶴嘉爲徭役所累自縊死過惶遽悲慟亦赴河死

陶鎮繼妻過夫病劇禱於嶽神刳臂以進夫病少愈越四年乃卒家貧苦節教子源成學道光二十年旌

過景昌妻朱年二十三景昌卒藉鍼指事舅姑及卒喪葬盡禮撫遺腹子福田成立旌

諸生匡廷梁妻朱青城鄉人廷梁家貧力學工詩文道光

辛巳染疫遽卒朱視含殮畢時夜已半潛啟後戶赴水
死旦得屍植立水中面如生鄒鳴鶴爲作傳同時周鼎
妻高鼎沾疫疾革高矢以死殉鼎死既殮舅姑防之潛
飲藥死知縣江之紀記其事

廉靖基妻王歸廉未彌月靖基暴病卒王自縊者再爲家
人所覺時姑已先卒祖姑何勸慰之曰汝無姑幸代姑
盡婦職勿重傷我心王泣諾閱九年何卒王曰予事畢
矣乃投繯死道光四年九月也七年旌

杜凌霄妻褚年二十九夫卒痛不欲生念孤元功甫七齡
無所依勤苦操作資紡績以教養年六十餘卒有女適

錢廷樑早寡孝翁姑撫孤子亦以節稱

范循鏞妻過年二十九而寡其姑朱命循鏞置田贍族未
就卒過克成先志捐義祭田五百五十畝事姑以孝稱
烈女高許字唐某唐卒父光斗悶不使女知女微覺卽撒
簪珥易素服跪父前泣請奔喪父無如何往告唐唐固
辭女因不食數日卒

闕增妻夏懷仁鄉人增同爨兄某覬夏有姿色百計誘之
夏訴於增增素懦弱久之又加以凌逼一日夏跪姑前
請分居某不肯析夏思無生理遂自經死

錢琳妻張二十八歲琳卒與妯娌婦諸生琦妻薛同守苦節

事翁姑均以孝稱

朱源聘妻李將嫁源病劇父母議改吉女飲泣不食父母憫其志屆期成禮源已彌留女隨姑起居數日源卒遂矢志永守先是源兄毓英聘妻虞毓英天女聞凶耗悲慟欲絕父母勸諭之女毀左目自誓越二日奔喪成禮亦苦守其勵人稱朱氏雙節云

過茂德妻倪年二十一茂德歿遺腹子耀宗家貧事姑孝紡績以奉甘旨教子有成苦節三十餘年卒

秦玉林妻吳年二十六而寡玉林曾割股愈親疾玉林卒吳孝事舅姑勗子成學守節十六年卒旌

諸生華雲墀妻朱年二十八而寡家貧事翁姑撫孤子均取給鍼指旌

丁煜聘妻吳國子生春源女年十五煜歿女請適丁成禮翁廷梁憐女年少固辭女哀痛自經母救之得不死遂適丁事重闈盡孝守貞十三年卒旌

孝女趙瑞雲年十九字秦某父振初病疽危在旦夕女泣禱於竈神願以身代自暮達旦忽發狂一日卒父病卽愈女妹慧貞字史未成婚夫卒時年十七母欲改字女誓死不二赴喪成禮家貧賴十指事姑逾二十年不懈秦均鎧妻陳年二十八而寡苦節盡孝撫子鴻達成立族

孫煥若妻方年十九夫亡子陶庵在襁褓方絕粒七日耳遂龔姑疾刲股以進

秦炳會妻張夫患瘵將不治婚有期矣母不遣嫁張告母曰既受秦聘往卽死無悔遂歸秦數月夫歿張哀毀旋卒

俞鈞妻秦鈞客死於閩秦聞欲以身殉時夫兄鏘宦於楚遂攜子女往託焉越日卽自縊死

賀勝玉妻薛年二十九而寡事翁姑盡孝紡績撫孤子得成立年八十四卒旌

孝女王淑貞錦女以父病母瞽諸弟幼小矢志養親善承

意旨父母俱賴以安道光八年旌

烈女倪鳳珠年十四歸養於某氏姑不安於室鳳珠嚴自保守居半載強暴謀污之鳳珠乃飲毒死

高鼎銓聘妻周榮慶將嫁鼎銓卒女欲奔喪守義高不許女卽守貞依父儀祥以居事父盡孝卒年三十有八

薛煦妻陳青城鄉人煦疾焚香禱天願代卒不起含殮畢遽吞金環翁姑泣諭以事育大義飲藥得不死遂治家

代子職者四十年撫二子皆成立道光十六年旌

孝女許奇姐年十二父兆麟貧窘暮夜自沈於河女力不能救赴水抱父死道光二十年六月二十四日事

孝婦尤德基妻顧事詳德基傳

烈婦林適婺源金待聘有子凝祥文祥兄蔚女曰明霞凝祥娶焉文祥娶於祝亦無錫人待聘挈家僑江甯道光二十二年英夷由鎮江擾江甯待聘適以事回里林聞警命從子徵祥買舟將沂江歸行至采石磯遇盜傾其橐與之盜既散復至斫蓬索舟不得行林曰事亟矣遲恐受辱遂自沈也二子從之明霞及祝見姑與夫皆死亦各抱子投於江初徵祥見盜至躍岸呼救至是反舟人語以死狀乃募習水者求屍三日得明霞尸瘞諸磯上侯楨爲之傳蔚咸豐中亦死難江西見忠節傳

孝女秦璽美知縣緇武女年二十父卒矢志事母不嫁再割股愈母疾先母卒同治十三年旌

國子生華汝璇妻張歸華逾年汝璇病且卒張豫匿毒遂服焉家人救以藥不納夫婦同日死旌

榮雲浦聘妻馮爲養媳于榮里社演劇鄰女或招與偕不可曰戲者戲也名既不正豈所宜觀姑疾馮禱竈神乞身代尋愈雲浦隨父雅山賈于蘇州以疫卒馮慟幾絕雅山陰欲女之而爲擇配馮聞絕粒議遂寢咸豐三年三月訛傳賊至夜相驚呼馮自經死年二十二

尤超曾妻趙超曾有痰疾仰事俯育趙一身任之咸豐十

年寇警日偪或勸徙居趙以姑張方卒柩在殯不忍離城陷從超曾及次子文炳女細妹同投水死

從九品鄒清華妻施咸豐十年城陷賊突入室欲犯之施曰釋汝刀乃從汝賊擲於地施乘間取以斫賊賊怒奪刀亂擊之至死罵不絕口從姪女芬適代州馮格從格父任縉雲同治元年賊陷縉雲施吞金自縊皆未死以刀自剄又不死賊憫其狀予以鴉片膏遂服而死

貢生朱光照妻楊兵部主事厚基之母也咸豐十年避居北鄉長安橋賊至匿屋後絕食數日鄰嫗以賊所遺糜粥相餉楊覆之地曰吾有死耳豈食賊餘夜赴水爲家

八所持尋自經死

舉人周汝直妻程幼從父受四子書通詩禮大義咸豐十年賊陷邑城汝直率礮船守獨山門拒賊頸三中刃絕而復蘇越數日賊大隊搜山夫婦走匿山麓程曰今日勢難兩全君善自爲計賊至脅汝直索金程給曰彼吾兄城中來惡得金我有金藏石罇中盍取諸賊從之行未數武聞池水洞然有聲則躍入死矣汝直遂得免華履長妻周佩蓀履長父希高見宦望傳希高因公虧帑家籍沒履長以布都事需次河南改廣東亦不得志以卒周茹苦操作數十年少嫻吟詠至是遂廢授諸孫讀

督責綦嚴咸豐十年避亂居許舍四月賊至次孫黼臣
遇害八月賊又至周赴水死次孫婦顧率二女從焉周
年七十五著有澣餘詩詞鈔周女諸生史應蘭妻及其
二女一爲顧穀妻一未嫁皆自沈死又顧珣妻亦應蘭
女罵賊被害死尤烈同治二年旌

烈婦張適含山國子生程光昭咸豐中避亂歸居邑之堠
山賊至張望見旗幟卽抱幼女投水死張能詩著有浣
蘭遺稿

鄒其璋聘妻蔡知縣培女未嫁其璋卒矢不再字侍父母
足不下樓者五十年父母卒懸像奉之如生成豐十年
避亂北鄉賊至投水死婢春香隨女不嫁亦罵賊被戕
同治十一年旌

范子偉妻顧涇里人少通文義咸豐十年聞寇警獨攜一
刀自隨人問之曰殺賊耳及賊至搜索財物顧大罵突
斫賊不中而賊刃交集死之子偉亦爲賊殺

諸生糜桂士女寶珍咸豐十年四月寇掠張村作絕命詞
一絕別父母從容赴水死年十三

施頰聘妻鄒恩貢生安邕女咸豐十年避亂居鄉而頰督
團禦賊以勞卒鄒聞欲自盡父母密守之許以不更字
旣而謂妹曰設親歿兄貧將誰依妹察其意坐臥與俱

閱數月竟伺間自經死同治十年旌

國子生司馬隲妻安安鎮人年十二刲臂愈母疾旣歸隲
隲病刲股者再卒不瘳矢志守節同治二年夏賊踪蔓
延安恐不免絕食死年二十四未幾賊至

孝女周貞一父光旭卒母章老因矢志奉母嘗禱天刲臂
愈母疾兄慶鈞久客江甯乃移家焉咸豐三年江甯城
陷兄已先卒章年九十餘病篤女獨侍左右賊亦不加
害母尋卒以被裹瘞諸庭而逸及官兵克江甯乃求骨
改葬時女年七十又數年卒以刲臂事旌于道光中

孝婦陶文揆妻尤事詳陶丙吉傳

孫雄培聘妻王雄培客游于外未成婚遽卒而王先以父
母歿歸夫家翁姑欲爲擇配王不可乃撫從子思敬爲
嗣事翁姑盡孝嘗刲臂愈姑疾同治九年旌

知縣顧楨妾湯虞城縣人楨知恩縣病篤他妾周割臂和
藥進不瘳將以身殉湯謂之曰汝有二子矣不可以累
女君楨卒湯視含殮畢吞金死旌

諸生楊鉞妻顧早寡姑病風廢事之盡孝數十年如一日
撫孤春池成立性好施雖困無倦以壽終

俞景壽繼妻秦年二十七而寡哭夫慟遽吞金環翁姑飲
以藥而吐之得不死恪盡婦職撫前室子敦培有恩年

七十七卒

孝女侯長姑四姑皆以事親不字父咸老病衣食湯藥悉手治以進父忘所苦母華膺劇疾醫云不治二女剝臂血爲疏禱天請代母尋愈幼弟病革時四姑嘗割肱療之曰吾亦知于禮爲過然吾親憂吾弟甚于疾痛之在躬萬一弟病得解猶解吾親之疾也年皆五十餘卒光緒五年旌

楊天錫繼妻陳歸楊三年而寡撫前室子女如己出喪葬婚嫁無失禮卒年五十四

諸生薛鳴和聘繼妻范未婚鳴和卒堅請歸於薛躬操作

執婦禮甚謹會遭寇亂自咽糠覈而奉舅姑必以甘脆撫鳴和前妻子丙元教養兼盡愛逾所生同治十年旌徐某妻虞觀莊農家女也歸徐數年而寡一日庭中紅鳳仙花盛開其子摘插母髻遽撤之詰旦花盡白人以爲苦節之感

貢生楊治安妻薛青城鄉人治安能文不遇客死湖北薛聞訃欲殉家人防閑之越六日乘間仰藥死旌顧其康妻陳浙之平陽縣人其出也微而性絕端謹從其康客汀州其康病劇託孤于其友華文浩而卒文浩爲經紀其喪葬有期陳抱子出拜曰君旣諾亡者之言矣

敢以相累文浩勸慰之陳曰母子孤孀故鄉萬里妾計已熟又何言遂仰藥死年二十六同治九年九月也合

葬于汀州東門外牛尿湖越二年旌

福建省志有傳

烈女馬大寶許字包文煒幼失母父廷燦貧而寄食于人女依從母施居舅范四家范子阿金屢調之不遂施故無行陰以事怒女金益無所忌一日挾刃往施見而奪之女泣求去施曰汝去何之乃不復言逾夕金偵女寢徑登其閣女號金手扼之女拒益力竟死年十八同治十一年五月十六日也廷燦至范款之他室旣斂則曰女與金有私事覺仰藥耳廷燦信不問而斂女者頗世

其狀於是廷燦及文煒之父共鳴諸官發棺檢尸捕金至立吐其實遂置諸法而旌女焉秦緡業爲之傳知縣爲黃陂張佑璧

諸生楊煒聘妻過聞夫病篤割股和藥告母寄療之弗瘳訃至號慟奔喪幾以身殉

吉大全妻馮安鎮人大全早歲失明馮曲盡婦道嘗刲臂愈姑疾一日鄰舍火起倉卒扶姑從烈焰中出幼子猶在室馮顛天哀求火亦尋滅

孝女龔秀鳳母成早卒父燦廷多病因矢志不嫁事父盡孝繼母陸亦善病女侍奉惟謹先陸卒旌

孝女楊母余少寡守節撫孤女善事母既長而美爭委禽
 焉乃撤環瑱長齋以見志母卒哭竟日而死年二十四
 嵇奉三妻謝福建人奉三以布經歷需次浙江病歸而歿
 無子越數日謝自經以殉浙江候補道秦緡業等請浙
 撫奏旌

至立也其實滋置荷而致文謂秦緡業為之請旌
 無錫金匱縣志卷二十八終

